

K450.8

3a

師範漢文

本科用

文部省

文部省調查會為刊行認贈

(第一級)



孟子 子鈔

史記列傳曰。孟軻。魯人也。受業子思之門人。道既通。游事齊宣王。宣王不能用。適梁。梁惠王不果所言。則見以爲迂遠而闕於事情。當是之時。秦用商君。富國彊兵。楚魏用吳起。戰勝弱敵。齊威王宣王用孫子田忌之徒。而諸侯東面朝齊。天下方務於合從連衡。以攻伐爲賢。而孟軻乃述唐虞三代之德。是以所如者不合。退而與萬章之徒序詩書。述仲尼之意。作孟子七篇。

韓子曰。孔子之道大而能博。門弟子不能獨觀而盡識也。故學焉而皆得其性之所近。其後離散分處諸侯之國。又各以所能授弟子。原遠而未益分。惟孟軻師子思。子思之學蓋出曾子。自孔子沒。獨孟軻氏之傳得其宗。故求觀聖人之道。必自孟子始。

程子曰。孟子有功於聖門。不可勝言。仲尼只說一箇仁字。孟子開口便說仁義。仲尼只說一箇志。孟子便說許多養氣出來。只此二字。其功甚多。○又曰。孟子有大功於世。以其言性善也。○又曰。孟子性善養氣之論。皆前聖所未發。

孟子見梁惠王。王曰。叟不遠千里而來。亦將有以利吾國乎。孟子對曰。王何必曰利。亦有仁義而已矣。王曰。何以利吾國。大夫曰。何以利吾家。士庶人曰。何以利吾身。上下交征利而國危矣。萬乘之國。弑其君者必千乘之家。千乘之國。弑其君者必百乘之家。萬取千焉。千取百焉。不爲不多矣。苟爲後義而先利。不奪不饜。未有仁而遺其親者也。未有義而後其君

者也。王亦曰仁義而已矣。何必曰利。（梁惠王上）
梁惠王曰：寡人之於國也，盡心焉耳矣。河內凶，則移其民於河東，移其粟於河內。河東凶亦然。察鄰國之政，無如寡人之用心者。鄰國之民不加少，寡人之民不加多，何也？孟子對曰：王好戰，請以戰喻。填然鼓之，兵刃既接，棄甲曳兵而走。或百步而後止，或五十步而後止，以五十步笑百步，則何如？曰：不可，直不百步耳，是亦走也。曰：王如知此，則無望民之多於鄰國也。不違農時，穀不可勝食也；數罟不入洿池，魚鼈不可勝食也；斧斤以時入山林，材木不可勝用也；穀與魚鼈不可勝食，材木不可勝用，是使民養生喪死無憾也。養生喪死無憾

王道之始也。五畝之宅，樹之以桑，五十者可以衣帛矣。雞豚狗彘之畜，無失其時，七十者可以食肉矣。百畝之田，勿奪其時，數口之家，可以無飢矣。謹庠序之教，申之以孝悌之義，頒白者不負戴於道路矣。七十者衣帛食肉，黎民不飢不寒，然而不王者，未之有也。狗彘食人食而不知檢，塗有餓殍而不知發，人死則曰非我也，歲也，是何異於刺人而殺之，曰非我也，兵也。王無罪歲，斯天下之民至焉。（梁惠王上）
孟子曰：我善養吾浩然之氣。公孫丑曰：敢問何謂浩然之氣？曰：難言也。其爲氣也，至大至剛，以直養而無害，則塞乎天地之間。其爲氣也，配義與道，無是餒也，是集義所生者，非義襲

而取之也。行有不慊於心，則餒矣。我故曰：告子未嘗知義，以其外之也。必有事焉，而勿正，心勿忘，勿助長也。無若宋人然。宋人有閔其苗之不長，而揠之者，芒芒然歸，謂其人曰：今日病矣，予助苗長矣。其子趨而往視之，苗則槁矣。天下之不助苗長者寡矣。以爲無益而舍之者，不耘苗者也；助之長者，揠苗者也。非徒無益，而又害之。（公孫丑上）

孟子曰：以力假仁者，霸。霸必有大國。以德行仁者，王。王不待大。湯以七十里，文王以百里，以力服人者，非心服也；力不贖也；以德服人者，中心悅而誠服也。如七十子之服孔子也。詩云：自西自東，自南自北，無思不服。此之謂也。（公孫丑上）

孟子曰：人皆有不忍人之心。先王有不忍人之心，斯有不忍人之政矣。以不忍人之心，行不忍人之政，治天下可運之掌上。所以謂人皆有不忍人之心者，今人乍見孺子將入於井，皆有怵惕惻隱之心。非所以內交於孺子之父母也，非所以要譽於鄉黨朋友也，非惡其聲而然也。由是觀之，無惻隱之心，非人也；無羞惡之心，非人也；無辭讓之心，非人也；無是非之心，非人也。惻隱之心，仁之端也；羞惡之心，義之端也；辭讓之心，禮之端也；是非之心，智之端也。人之有是四端也，猶其有四體也。有是四端而自謂不能者，自賊者也；謂其君不能者，賊其君者也。凡有四端於我者，知皆擴而充之矣。若火之

始然。泉之始達，苟能充之，足以保四海。苟不充之，不足以事父母。（公孫丑上）

景春曰：公孫衍、張儀，豈不誠大丈夫哉！一怒而諸侯懼，安居而天下熄。孟子曰：是焉得為大丈夫乎？子未學禮乎？丈夫之冠也，父命之；女子之嫁也，母命之；往送之門，戒之曰：往之女家，必敬必戒，無違夫子。以順為正者，妾婦之道也。居天下之廣居，立天下之正位，行天下之大道，得志與民由之，不得志獨行其道，富貴不能淫，貧賤不能移，威武不能屈，此之謂大丈夫。（滕文公下）

孟子曰：不仁者可與言哉！安其危而利其菑，樂其所以亡者，

不仁而可與言，則何亡國敗家之有？有孺子歌曰：滄浪之水清兮，可以濯我纓；滄浪之水濁兮，可以濯我足。孔子曰：小子聽之，清斯濯纓，濁斯濯足矣，自取之也。夫人必自侮，然後人侮之；家必自毀，而後人毀之；國必自伐，而後人伐之。太甲曰：天作孽，猶可違；自作孽，不可活。此之謂也。（離婁上）

孟子曰：君子所以異於人者，以其存心也。君子以仁存心，以禮存心。仁者愛人，有禮者敬人。愛人者人恆愛之，敬人者人恆敬之。有人於此，其待我以橫逆，則君子必自反也。我必不仁也，必無禮也。此物奚宜至哉！其自反而仁矣，自反而有禮矣。其橫逆由是也，君子必自反也。我必不忠，自反而忠矣。其

橫逆由是也。君子曰：此亦妄人也已矣。如此則與禽獸奚擇哉？於禽獸又何難焉。是故君子有終身之憂，無一朝之患也。乃若所憂則有之，舜人也，我亦人也。舜爲法於天下，可傳於後世，我由未免爲鄉人也。是則可憂也。憂之如何？如舜而已矣。若夫君子所患則亡矣，非仁無爲也，非禮無行也。如有一朝之患，則君子不患矣。（離婁下）

孟子曰：牛山之木嘗美矣，以其郊於大國也。斧斤伐之，可以爲美乎？是其日夜之所息，雨露之所潤，非無萌蘖之生焉。牛羊又從而牧之，是以若彼濯濯也。人見其濯濯也，以爲未嘗有材焉。此豈山之性也哉？雖存乎人者，豈無仁義之心哉？其

所以放其良心者，亦猶斧斤之於木也。旦而伐之，可以爲美乎？其日夜之所息，平旦之氣，其好惡與人相近也者幾希，則其旦晝之所爲，有梏亡之矣。梏之反覆，則其夜氣不足以存。夜氣不足以存，則其違禽獸不遠矣。人見其禽獸也，而以爲未嘗有才焉者，是豈人之情也哉？故苟得其養，無物不長，苟失其養，無物不消。孔子曰：操則存，舍則亡，出入無時，莫知其鄉，惟心之謂與。（告子上）

孟子曰：仁，人心也；義，人路也。舍其路而弗由，放其心而不知求，哀哉！人有雞犬放，則知求之；有放心而不知求，學問之道無他，求其放心而已矣。（告子上）

孟子曰。舜發於畎畝之中。傅說舉於版築之間。膠鬲舉於魚鹽之中。管夷吾舉於士。孫叔敖舉於海。百里奚舉於市。故天將降大任於是人也。必先苦其心志。勞其筋骨。餓其體膚。空乏其身。行拂亂其所為。所以動心忍性。曾益其所不能。人恆過。然後能改。困於心。衡於慮。而後作。徵於色。發於聲。而後喻。入則無法家拂士。出則無敵國外患者。國恆亡。然後知生於憂患。而死於安樂也。(告子下)

孟子曰。盡其心者。知其性也。知其性。則知天矣。存其心。養其性。所以事天也。夭壽不貳。修身以俟之。所以立命也。(盡心上)
孟子曰。人之所不學而能者。其良能也。所不慮而知者。其良

知也。孩提之童。無不知愛其親也。及其長也。無不知敬其兄也。親親仁也。敬長義也。無他。達之天下也。(盡心上)

孟子曰。君子有三樂。而王天下不與存焉。父母俱存。兄弟無故。一樂也。仰不愧於天。俯不忤於人。二樂也。得天下英才而教育之。三樂也。君子有三樂。而王天下不與存焉。(盡心上)

孟子曰。君子之所以教者五。有如時雨化之者。有成德者。有達財者。有答問者。有私淑艾者。此五者。君子之所以教也。

(盡心上)

論語鈔

史記世家曰。孔子名丘。字仲尼。其先宋人。父叔梁紇。母顏氏。以魯襄公二十二年庚戌之歲十一月庚子生孔子於魯昌平鄉陬邑。爲兒嬉戲。常陳俎豆。設禮容。及長爲委吏。料量平。爲司職吏。畜蕃息。適周問禮於老子。既反。而弟子益進。昭公二十五年甲申。孔子年三十五。昭公奔齊。魯亂。於是適齊。爲高昭子家臣。以通乎景公。公欲封以尼谿之田。晏嬰不可。公感之。孔子遂行。反乎魯。定公元年壬辰。孔子年四十三。而季氏強僭。其臣陽虎作亂專政。故孔子不仕。而退修詩書禮樂。弟子彌衆。九年庚子。孔子年五十一。公山不狃以費畔季氏。召孔子。欲往。而卒不行。定公以孔子爲中都宰。一年四方則之。遂爲司空。又爲大司寇。十年辛丑。相定公會齊侯於夾谷。齊人歸魯侵地。十二年癸卯。使仲由爲季氏宰。墮三都。收其甲兵。孟氏

不肯墮。成。圍之不克。十四年乙巳。孔子年五十六。攝行相事。誅少正卯。與聞國政。三月。魯國大治。齊人歸女樂以沮之。季桓子受之。郊又不致。膾俎於大夫。孔子行。適衛。主於子路妻兄顏濁鄒家。適陳。過匡。匡人以爲陽虎而拘之。既解。還衛。主蘧伯玉家。見南子。去適宋。司馬桓魋欲殺之。又去適陳。主司城貞子家。居三歲。而反于衛。靈公不能用。晉趙氏家臣佛肸以中牟畔。召孔子。孔子欲往。亦不果。將西見趙簡子。至河而反。又主蘧伯玉家。靈公問陳。不對而行。復如陳。季桓子卒。遺言謂康子。必召孔子。其臣止之。康子乃召冉求。孔子如蔡及葉。楚昭王將以書社地封孔子。令尹子西不可。乃止。又反乎衛。時靈公已卒。衛君輒欲得孔子爲政。而冉求爲季氏將。與齊戰有功。康子乃召孔子。而孔子歸魯。實哀公之十一年丁巳。而孔子年六十八矣。然魯終不能用孔子。孔子亦不求仕。乃敍書傳禮記。刪詩正樂。序易象繫象說卦文言。弟子蓋三千焉。身通六藝者七十二人。十四年庚申。魯西狩獲麟。孔子作春秋。明年辛酉。子路死於衛。十六年壬戌。四月己丑。孔子卒。年七十三。葬魯城北泗上。弟子皆服心喪三年而去。唯子貢

庶於家上凡六年。孔子生鯉。字伯魚。先卒。伯魚生伋。字子思。作中庸。

何氏曰。魯論語二十篇。齊論語別有問王。知道。凡二十二篇。其二十篇中。

章句頗多於魯論。古論出孔氏壁中。分變曰。下章子張問以爲一篇。有兩

子張。凡二十一篇。篇次不與齊魯論同。

程子曰。讀論語。有讀了全然無事者。有讀了後。其中得一兩句喜者。有讀

了後。知好之者。有讀了後。直有不知手之舞之。足之蹈之者。

程子曰。今人不會讀書。如讀論語。未讀時。是此等人。讀了後。又只是此等

人。便是不會讀。

程子曰。願自十七八讀論語。當時已曉文義。讀之愈久。但覺意味深長。

學而第一

子曰。學而時習之。不亦說乎。有朋自遠方來。不亦樂乎。人不知而不慍。不亦君子乎。

有子曰。其爲人也孝弟。而好犯上者鮮矣。不好犯上。而好作亂者。未之有也。君子務本。本立而道生。孝弟也者。其爲仁之本與。

子曰。君子不重。則不威。學則不固。主忠信。無友不如己者。過則勿憚改。

子禽問於子貢曰。夫子至於是邦也。必聞其政。求之與。抑與之與。子貢曰。夫子溫良恭儉讓以得之。夫子之求之也。其諸異乎人之求之與。

子曰。不患人之不己知。患不知人也。

爲政第二

子曰。爲政以德。譬如北辰居其所而衆星共之。

子曰。詩三百。一言以蔽之。曰。思無邪。

子曰。道之以政。齊之以刑。民免而無恥。道之以德。齊之以禮。有恥且格。

子曰。吾十有五而志于學。三十而立。四十而不惑。五十而知天命。六十而耳順。七十而從心所欲不踰矩。

子游問孝。子曰。今之孝者。是謂能養。至於犬馬。皆能有養。不敬何以別乎。

子曰。溫故而知新。可以爲師矣。

子曰。學而不思則罔。思而不學則殆。

子曰。由。誨女知之乎。知之爲知之。不知爲不知。是知也。

子曰。非其鬼而祭之。諂也。見義不爲。無勇也。

八佾第三

子曰。人而不仁。如禮何。人而不仁。如樂何。

林放問禮之本。子曰。大哉問。禮與其奢也寧儉。喪與其易也寧戚。

儀封人請見。曰。君子之至於斯也。吾未嘗不得見也。從者見之。出曰。二三子。何患於喪乎。天下之無道也久矣。天將以夫

子爲木鐸。

子謂韶。盡美矣。又盡善也。謂武。盡美矣。未盡善也。

里仁第四

子曰。不仁者。不可以久。處約。不可以長。處樂。仁者安仁。知者利仁。

子曰。惟仁者能好人。能惡人。

子曰。富與貴。是人之所以欲也。不以其道得之。不處也。貧與賤。是人之所以惡也。不以其道得之。不去也。君子去仁。惡乎成名。君子無終食之間違仁。造次必於是。顛沛必於是。

子曰。朝聞道。夕死可矣。

子曰。參乎。吾道一以貫之。曾子曰。唯。子出門人問曰。何謂也。曾子曰。夫子之道。忠恕而已矣。

子曰。德不孤。必有鄰。

公冶長第五

子謂子貢曰。女與回也孰愈。對曰。賜也何敢望回。回也聞一以知十。賜也聞一以知二。子曰。弗如也。吾與女弗如也。

子曰。吾未見剛者。或對曰。申枨。子曰。枨也慾。焉得剛。

子曰。晏平仲。善與人交。久而敬之。

顏淵季路侍。子曰：「盍各言爾志。」子路曰：「願車馬衣輕裘，與朋友共，敝之而無憾。」顏淵曰：「願無伐善，無施勞。」子路曰：「願聞子之志。」子曰：「老者安之，朋友信之，少者懷之。」
子曰：「十室之邑，必有忠信如丘者焉，不如丘之好學也。」

雍也第六

哀公問：「弟子孰爲好學？」孔子對曰：「有顏回者，好學，不遷怒，不貳過，不幸短命死矣。今也則亡，未聞好學者也。」
子曰：「賢哉回也！一簞食，一瓢飲，在陋巷，人不堪其憂，回不改其樂。賢哉回也！」

子曰：「質勝文則野，文勝質則史，文質彬彬，然後君子也。」
子曰：「知之者，不如好之者，好之者，不如樂之者。」
子曰：「知者樂水，仁者樂山。知者動，仁者靜。知者樂，仁者壽。」
子貢曰：「如有博施於民，而能濟衆，何如？可謂仁乎？」子曰：「何事於仁！必也聖乎！堯舜其猶病諸！夫仁者，己欲立而立人，己欲達而達人，能近取譬，可謂仁之方也已。」

述而第七

子曰：「默而識之，學而不厭，誨人不倦，何有於我哉？」
子曰：「德之不脩，學之不講，聞義不能徙，不善不能改，是吾憂也。」

也。

子曰。志於道。據於德。依於仁。游於藝。

子曰。不憤不啓。不悱不發。舉一隅而示之。不以三隅反。則不復也。

子謂顏淵曰。用之則行。舍之則藏。唯我與爾有是夫。子路曰。子行三軍。則誰與。子曰。暴虎馮河。死而無悔者。吾不與也。必也臨事而懼。好謀而成者也。

子曰。飯疏食。飲水。曲肱而枕之。樂亦在其中矣。不義而富且貴。於我如浮雲。

葉公問孔子於子路。子路不對。子曰。女奚不曰。其爲人也發。

憤忘食。樂以忘憂。不知老之將至云爾。

子曰。天生德於予。桓魋其如予何。

子曰。二三子以我爲隱乎。吾無隱乎爾。吾無行不與。二三子者。是丘也。

子曰。仁遠乎哉。我欲仁。斯仁至矣。

子曰。君子坦蕩蕩。小人長戚戚。

子溫而厲。威而不猛。恭而安。

泰伯第八

曾子有疾。召門弟子曰。啓予足。啓予手。詩云。戰戰兢兢。如臨

深淵如履薄冰。而今而後。吾知免夫。小子。

曾子曰。可以託六尺之孤。可以寄百里之命。臨大節而不可奪也。君子人與。君子人也。

曾子曰。士不可以不弘毅。任重而道遠。仁以爲己任。不亦重乎。死而後已。不亦遠乎。

子曰。學如不及。猶恐失之。

子罕第九

子絕四。毋意。毋必。毋固。毋我。

子畏於匡。曰。文王既沒。文不在茲乎。天之將喪斯文也。後死

者。不得與於斯文也。天之未喪斯文也。匡人其如予何。

顏淵喟然歎曰。仰之彌高。鑽之彌堅。瞻之在前。忽焉在後。夫子循循然善誘人。博我以文。約我以禮。欲罷不能。既竭吾才。如有所立。卓爾。雖欲從之。末由也已。

子在川上曰。逝者如斯夫。不舍晝夜。

子曰。譬如爲山。未成一簣。止吾止也。譬如平地。雖覆一簣。進吾往也。

子曰。後生可畏。焉知來者之不如今也。四十五十而無聞焉。斯亦不足畏也已。

鄉黨第十

孔子於鄉黨恂恂如也。似不能言者。其在宗廟朝廷。便便言。唯謹爾。

先進第十一

子曰。從我於陳蔡者。皆不及門也。

德行顏淵。閔子騫。冉伯牛。仲弓。言語宰我。子貢。政事冉有。季路。文學子游子夏。

顏淵死。子曰。噫。天喪予。天喪予。

顏淵死。子哭之慟。從者曰。子慟矣。曰。有慟乎。非夫人之爲慟。

而誰爲。

子貢問。師與商也孰賢。子曰。師也過。商也不及。曰。然則師愈與。子曰。過猶不及。

子畏於匡。顏淵後。子曰。吾以女爲死矣。曰。子在。回何敢死。子路曾皙冉有公西華侍坐。子曰。以吾一日長乎爾。毋吾以也。居則曰。不吾知也。如或知爾。則何以哉。子路卒爾而對曰。千乘之國。攝乎大國之間。加之以師旅。因之以饑饉。由也爲之比。及三年。可使有勇。且知方也。夫子哂之。求爾何如。對曰。方六七十。如五六十。求也爲之比。及三年。可使足民。如其禮樂。以俟君子。赤爾何如。對曰。非曰能之。願學焉。宗廟之事。如

師範漢文

本科用

文部省

文部省調查局刊行課寄贈

(第一級)

Approved by Ministry of Education
(Date Apr. 1, 1946)

昭和二十一年四月六日
昭和二十一年四月六日
昭和二十一年四月六日
昭和二十一年四月六日
昭和二十一年四月六日
昭和二十一年四月六日
昭和二十一年四月六日
昭和二十一年四月六日

師範漢文 本科用
定價金九拾錢

著作權所有 文部省

昭和二十一年四月六日
文部省檢査済

印刷發行所

東京都神田區錦町一丁目十六番地
師範學校教科書株式會社
代表者 森下 松衛

印刷者

東京都京橋區人舟町二丁目十一番地
新井修平
代表者 新井修平

發行所

東京都神田區錦町一丁目十六番地
師範學校教科書株式會社